

Inzko: Angažman građana ne prestaje sa izbornim danom



Visoki predstavnik Valentin Inzko pozdravio je činjenicu da su građani BiH preuzeli aktivnu ulogu u demokratskom procesu i ostvarili svoje pravo da glasaju na lokalnim izborima u nedjelju.

„Izlaznost manja od 55 posto donekle je razočaravajuća. Ali, važno je da građani nastavljaju igrati aktivnu ulogu u oblikovanju vlastite budućnosti, odlučujući o tome ko će ih predstavljati u lokalnim zajednicama u sljedeće četiri godine,“ rekao je visoki predstavnik Inzko.

Komentirajući probleme u općini Stolac, uključujući i nasilne incidente, visoki predstavnik je najoštrije osudio takav razvoj događaja. „Očekujem od svih relevantnih institucija da provedu punu istragu i aktere dovedu pred lice pravde. Ono što se desilo u Stocu je sramota koja utiče na sve, ne samo na one koji su direktno uključeni. To se ne može tolerirati u jednom demokratskom društvu koje teži da prigrli evropske vrijednosti.“

Visoki predstavnik također je komentirao činjenicu da su građani Mostara još jednom bili lišeni osnovnog prava da izaberu svoje lokalne predstavnike. „Vodeće političke stranke u Mostaru snose odgovornost za ovo cinično i sramotno nepoštivanje građana Mostara. Njihova je obaveza da nađu rješenje za Mostar. Moraju ga naći, jer ovo pitanje neće samo od sebe nestati.“

Obraćajući se građanima i izabranim zvaničnicima, visoki predstavnik Inzko je rekao: „Kada budu poznati kompletni rezultati i kada ih Centralna izborna komisija potvrdi, oni koji su izabrani treba da prije svega služe građanima i njihovim interesima. Moraju imati na umu ko ih je izabrao i ko ih može smijeniti u slučaju da ne obavljaju svoj posao. Istovremeno, građanski angažman ne prestaje samim činom glasanja. Komunicirajte sa svojim izabranim liderima. Neka znaju koja su to pitanja važna vama i vašoj zajednici, i šta od njih očekujete. To je vaše pravo.“